

VITA NEA

Ćianties fines barbotëia
dlûngia bosch le picio rü;
da trá sâlc sën ciafa vëia
inc' l' arôsch te chël parü.

Y sön tët se pizacrëia
lighertzins endô i vicí;
tomp d'amûr, oh cí morvëia,
por düc cânc sën este gnü.

Pasca vën y vita pôrta
te nosc cör spo vigne ann;
rich y püre se confôrta,
an ne spera mai debann.

Giuvani Pescollderungg
(Val Badia)



FÖIES

Sön en lëgn düt d' ôr depënt,
maliziûs y cun gran vöia
da se tó cun ël vâl' föia
vigne rama scassa l' vënt.

Jö dal lëgn gaiêrt y stôrt,
dala piza y dales rames
föies rosses, ghêles, grames
mët sëgn man le bal dla môrt.

Mile föies da corûsc,
meses môrtes, düt dlaciades,
da jënt ch' passa vëgn pestades
tal paltan y te chi trûsc.

Al lëgn blûder en salüt
y l' altonn a düc i pîta
ores lûnges d' vita chîta;
la nêi toma y stopa düt.

Giuvani Pescollderungg
(Val Badia)

